

Saturday, September 13, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

PM INAUGURATED RAILWAY

Prime Minister Pu Narendra Modi chuan Sairang leh Baibari inkar rel kawng chu vawiin khan a hawng a. Aizawl Lammual atanga hawn tura ruahman chu khua in a bumro avangin Lengpui atangin Video Conference kaltlangin a hawng ta zawk a ni.

Pu Narendra Modi chuan, Mizoram chu India ram hmasawnna atana kawng pawimawh tak a ni a ti a, vawiin atang chuan India railway map-ah Mizoram a lang tawh dawn a ni, a ti.

(Byte: Prime Minister)

Prime Minister chuan, hun rei tak atanga an hmathlir Sairang leh Bairabi rel kawng chu a takin a hlawhtling ta a, hemi hlawhtlinna atana tha thawhtute chungah ka lawm em em a, hei hi relkawng ringawt a ni lo a, hei hi hmasawnna bultanna a ni a, Mizo mipuite tana kawng hawnsaktu, eizawnna hmuhsaktu, kut hnathawktute tana thlai thar hralhna tur kawng awlsam, khualzin tan kawng awlsam zawk a siam dawn a ni, a ti.

Pu Narendra Modi-a chuan kum 11 chhungin hmarchhak bial hmasawnna tur atan theihtawp an chhuah thin tih a sawi a, kum rei tak chhung chu inkalpawhna leh inbiakpawhna kawng a awlsam lo thin tih sawiin hemi kawngah hian hun rei tak Mizoram chuan hmathlir nei mah se hmasawnna a awm lo thin a ti a, tunah chuan an sawrkar hnuaiah hmasawnna a awm tih sawiin hmarchhak bial hmasawnna chu ram hmasawnna a ni tih a sawi bawk a ni.

Mizoram hi Act East Policy tan kawng pawimawh tak niin economic corridor pawimawh tak a ni a, KMMTTP pawh kawng pawimawh tak a ni tih sawiin Prime Minister chuan Mizoram chu rampawn te nen insumdawn tawnaah hmun pawimawh tak a ni dawn tih a sawi.

PM hian hmarchhak bial chu sumdawnna bultan mek te tan hmun pawimawh tak a ni chho mek tih sawiin hetah hian thalai tam takin hna an thawk a ti a, India hi khawvelah hmun dang nena insumdawn tawna ah hma a sawn zel tih sawiin infiamna leh kawng hrang hrangah hma a sawn tih a sawi.

Sairang leh Baibari inkar rel kawng hi KM 51.38 a thui niin cheng vaibelchhe 8071 senga siam a ni a, Prime Minister hian Mizorama rel service thar pathum: Aizawl - Delhi Rajdhani Express (Anand Vihar Terminal), Aizawl - Kolkata Express leh Aizawl - Guwahati Express te a vailiam bawk.

Rel kawng bakah hian cheng vaibelchhe 33 senga sak Kawrthaha Residential School leh vaibelchhe 24 senga sak Tlangnuam Eklavya Model Residential School chu a hawng bawk a.

Cheng vaibelchhe 500 senna tur Aizawl Western Side Bypass Road; vaibelchhe 226 senga thawh tur Mualkhanga 30 Tounsand Metric Tons Per Annum Gas Bottling Plant; vaibelchhe 70 senga thawh tur Chhimtuipui (Tuipui Ferry) lei (Bridge); vaibelchhe 45 senga thawh tur Thenzawl - Sialsuk kawngpui; vaibelchhe 32 senga laih tur Khankawn - Rongura Hmun kawngpui leh vaibelchhe 12 senga thawh tur Tuikuala Khelo Multipurpose Hall te lungphum a phum bawk a ni.



CM

Chief Minister Pu Lalduhoma chuan Bairabi – Sairang Railway hawn a ni ta chu Mizoram tan ni chhin chhiahtlak tak a ni a, Mizoramin rel kawng an nei tur chu Ramchhung inpawhtlanna atana Prime Minister hmathlir tih hlawhtlinna pawimawh tak a ni a ti.

Aizawl Lammuala thu a sawiah Chief Minister chuan, rel kawng hian Mizoram chu ramchhunga hmundang nen intlawhpawhna awlsam zawk a siamsak dawn tih a sawi, kum2023 August thlaa rel kawng siam naa chetsualna thlenga nunna chan te an hre reng tih sawiin an hnathawhna avanga tun dinhmun thleng an ni a ti a, Mizoramin relkawng a nei tur chuan tun hma atanga Mizoram hmathlir a takin a rawn lantir a ti a, eizawnna kawngah leh thangthar lo awm zel tur ten an chhawr tangkai dawn tih a sawi bawk.



ZMC&H

Department of Health Research, Ministry of Health & Family Welfare in a buatsaih - Viral Reseach and Diagnostic Laboratory (VRDL) VRDL Conclave 2025-ah ZMC&H chu Best Practices VRDL leh Award of Excellence lawmman a dawng.

New Delhi-a neih he hunah hian, ICMR bul tum a VRDL tha thlan chhuah zingah VRDL, ZMC&H chu Silver Category-ah India ram pumah 5 na a luah pha a. He lawmman hi Union Minister of Health & Family Welfare, Smt. Anupriya Patel chuan a hlan a ni.

Tunah hian India ramah VRDL 164 a awm in, VRDL, ZMC&H hi 2021-ah din a ni a, tunah hian Dept of Microbiology ZMC&H in he laboratory hi a enkawl mek a ni. He laboratory hi virus natna hmuhchhuah kawnga kan hmatheh ber niin, covid, influenza, leh virus hrang hrang hmuchhuak in damlo tamtak inenkawlna kawngah a tanpui mek a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zandin dar 6 leh a chanve-ah Chanchinthar puan leh a ni ang.



RAILWAY - SAIRANG

Prime Minister Narendra Modi-a'n Lengpui Airport atanga Sairang leh Bairabi inkar rel a vailiam rualin, Sairang rel chawlh hmun (station) atanga rel tlan chhuak hmasa ber, Rajdhani Express chu Bairabi lam panin a tlan chhuak a ni.

Akashvani zawhna chhangin, Sairang atanga rel tlan chhuak hmasa ber vailiam thlir tura Mizoram hmun hrang hrang atanga Sairang rel chawlh hmun a kal te chuan an phur tawh hle tih an sawi a, Sairanga chengte pawhin an khua chu chawlh hmun hmunpui ber a nih dawn avangin an tan a tangkai dawn hle a an hriat a thu an sawi a, fur laia kawngchhia vanga Mizoramin bungraw lakluh lama harsatna a tawh thin chu rel lo lut chuan engemawchenah a chinfel an rin thu te, thingtlang a chengte pawhin man man zawka thil man an lei theihna tur ni a an hriat thu te, rel chu man tlawm zawka mitin ban phak a nih avangin Mizo zirlaite'n awlsam zawkin ram chhung hmun dangah te zirna sang zawk an zir theih phah dawn a, ram chhunga damdawilama inenkawlna tha tak te te pawh pan awlsam tawh dawn bakah ram chhung hmun danga chengte nen inunauna tha zawk a thlen an rin thu an sawi a ni.

